



Llywodraeth Cymru  
Welsh Government

---

## DATGANIAD YSGRIFENEDIG GAN LYWODRAETH CYMRU

---

**TEITL** Rheoliadau'r Rheolaethau Swyddogol ar gyfer Bwyd, Bwyd Anifeiliaid ac Iechyd a Lles Anifeiliaid (Diwygio ac ati.) (Ymadael â'r UE) 2019

**DYDDIAD** 5 Chwefror 2019

**GAN** Rebecca Evans AC, Y Gweinidog Cyllid a'r Trefnydd

**Rheoliadau'r Rheolaethau Swyddogol ar gyfer Bwyd, Bwyd Anifeiliaid ac Iechyd a Lles Anifeiliaid (Diwygio ac ati.) (Ymadael â'r UE) 2019**

### Cyfraith yr UE a ddargedwir sy'n cael ei diwygio

- Rheoliad (CE) Rhif 882/2004 Senedd Ewrop a'r Cyngor Ewropeaidd ar reolaethau swyddogol a gyflawnir i wirio cydymffurfiaeth â chyfraith bwyd a bwyd anifeiliaid, rheolau iechyd a lles anifeiliaid
- Penderfyniad y Comisiwn 2006/677 yn pennu'r canllawiau sy'n gosod meini prawf ar gyfer cynnal archwiliadau o dan Reoliad (CE) Rhif 882/2004 Senedd Ewrop a'r Cyngor Ewropeaidd ar reolaethau swyddogol i wirio cydymffurfiaeth â chyfraith bwyd a bwyd anifeiliaid, rheolau iechyd a lles anifeiliaid
- Penderfyniad y Comisiwn 2008/654 ar ganllawiau i gynorthwyo Aelod-wladwriaethau wrth baratoi'r adroddiad blynyddol ar y cynllun rheoli cenedlaethol amflwydd integredig sengl y darperir ar ei gyfer yn Rheoliad (CE) Rhif 882/2004
- Rheoliad (UE) 2017/625 Senedd Ewrop a'r Cyngor Ewropeaidd ar reolaethau swyddogol a gweithgareddau swyddogol eraill a gyflawnir i sicrhau y cymhwysir cyfraith bwyd a bwyd anifeiliaid, rheolau ar iechyd a lles anifeiliaid, iechyd planhigion a chynhyrchion diogelu planhigion.

### Y gyfraith UE sy'n cael ei dirymu

- Rheoliad (UE) Rhif 415/2013 o 6 Mai 2013 sy'n pennu cyfrifoldebau a thasgau ychwanegol ar gyfer labordai ymchwil yr UE ar gyfer y gynddaredd (*rabies*), twbercwlosis buchol ac iechyd gwenyn, sy'n diwygio Rheoliad (CE) Rhif 737/2008 ac yn diddymu Rheoliad (UE) Rhif 87/201.

### Unrhyw effaith y gall yr OS ei chael ar gymhwysedd deddfwriaethol y Cynulliad a/neu gymhwysedd gweithredol Gweinidogion Cymru

Bydd yr OS hwn yn cryfhau pwerau gweithredol Gweinidogion Cymru. Bydd yn trosglwyddo pwerau'r Comisiwn Ewropeaidd, gan gynnwys swyddogaethau rheoleiddio, o dan Reoliad 882/2004 i Weinidogion Cymru mewn perthynas â Chymru. Bydd hyn yn eu galluogi nhw i lunio rheoliadau, yn ddarostyngedig i ddirymiad trwy benderfyniad y Cynulliad Cenedlaethol,

ar faterion gan gynnwys pennu mathau o fwyd a bwyd anifeiliaid y mae'n rhaid iddynt fod yn destun ragor o reolaethau mewnfario, y gwiriadau y mae'n rhaid eu cynnal ar fwyd a bwyd anifeiliaid i'w hallfario, rhagnodi ffurflen ar gyfer tystysgrifau allfario o drydydd gwledydd a rhagnodi amodau mewnfario penodol. Bydd swyddogaethau nad ydynt yn rhai deddfwriaethol yn cynnwys sefydlu canllawiau ar gyfer rheolaethau swyddogol, paratoi ac adolygu cynllun rheoli cenedlaethol ac adrodd ar archwiliadau ar reolaethau swyddogol. Ni fydd yr OS yn cael unrhyw effaith ar gymhwysedd deddfwriaethol y Cynulliad.

### **Diben y diwygiadau**

Diben y diwygiadau yw cywiro diffygion sy'n deillio o'r DU yn ymadael â'r Undeb Ewropeaidd yn neddfwriaeth uniongyrchol yr UE a ddargedwir sy'n pennu'r rheolaethau swyddogol a gyflawnir i wirio cydymffurfiaeth â chyfraith bwyd a bwyd anifeiliaid, a rheolau iechyd a lles anifeiliaid. Mae deddfwriaeth yr UE a ddargedwir yn nodi'r rheolaethau y mae'n rhaid eu gweithredu (yn bennaf gan awdurdodau cymwys dynodedig) i sicrhau cydymffurfiaeth â chyfraith bwyd a bwyd anifeiliaid a rheolau iechyd a lles anifeiliaid. Gallai'r rhain gynnwys arolygu, samplu, monitro, archwilio busnesau bwyd neu reolaethau arbenigol eraill.

Bydd y Rheoliadau'n gwneud cywiriadau technegol megis cael gwared ar gyfeiriadau at sefydliadau'r UE ac Aelod-wladwriaethau eraill a bydd yn diffinio 'trydydd gwledydd' fel unrhyw wlad y tu allan i'r DU.

Mae'r prif gywiriadau i'w gwneud gan y Rheoliadau hyn yn cynnwys trosglwyddo swyddogaethau'r Comisiwn, gan gynnwys swyddogaethau llunio rheoliadau, o dan gyfraith yr UE sy'n uniongyrchol berthnasol i Weinidogion Cymru mewn perthynas â Chymru. Bydd y rhain yn bwerau i lunio rheoliadau ar gyfer cyflawni rheolaethau swyddogol ar fwyd a bwyd anifeiliaid, gan gynnwys:

- pennu'r mathau o fwyd a bwyd anifeiliaid y mae'n rhaid iddynt fod yn destun ragor o reolaethau mewnfario,
- y gwiriadau y mae'n rhaid eu cynnal ar fwyd a bwyd anifeiliaid i'w hallfario,
- rhagnodi ffurflen ar gyfer tystysgrifau allfario o drydydd gwledydd, a
- rhagnodi amodau mewnfario penodol.

Bydd yr OS yn gwneud mân ddiwygiadau i gyfraith yr UE a ddargedwir i sicrhau bod y ddeddfwriaeth yn parhau i fod yn ymarferol heb wneud unrhyw newid sylweddol i lefelau diogelu iechyd pobl nac anifeiliaid neu i safon uchel y bwyd a bwyd anifeiliaid y mae defnyddwyr yn ei disgwyl o gynhyrchion a gynhyrchir yn ddomestig a chynhyrchion a fewnforir.

Gellir gweld yr OS a'r Memorandwm Esboniadol, sy'n nodi effaith bob diwygiad yma: <https://beta.parliament.uk/work-packages/ShVLCeCF>

### **Pam rhoddwyd caniatâd**

Nid oes unrhyw wahaniaeth rhwng Llywodraeth Cymru/ASB Cymru a Llywodraeth y DU (ASB y DU) o ran y polisi ar gyfer y cywiriadau. Felly, byddai creu OSau ar wahân yng Nghymru ac yn Lloegr yn arwain at ddyblygu, a chymhlethu'r llyfr statud heb fod angen. Bydd cydsynio i OS ar gyfer y DU i gyd yn sicrhau bod un fframwaith deddfwriaethol ar

draws y DU sy'n hyrwyddo eglurder a hygyrchedd yn ystod y cyfnod hwn o newid. Dan yr amgylchiadau eithriadol hyn, mae ASB Cymru/Llywodraeth Cymru o'r farn ei bod yn briodol fod Llywodraeth y DU yn deddfu ar ein rhan yn yr achos hwn.